

民国名人小传

唐祖培著

自联出版社

2828.6

802

港台書室

270437

唐祖培著

民國名人小傳



自聯出版社印行



90102003

自序

傳之爲言傳也，必其人生平有不朽之德行功業言論文章，可傳於後世；顧代遠年淹，後人往往無從傳之，或傳之而易於失實，於是歷代正史之紀傳體尙矣。人之初生，莫不有名，名人之稱，義似不正；惟名稱歿世而名垂宇宙者，斯可謂之名人，否則虛生一世，名先身亡，草木同朽，有何足傳？名人傳之作，非所謂述往以勸來者乎！人類歷史，乃各類名人在某一空間與某一時間之活動。故名人之降生，固不限於某一國家與某一時期；而在任何國家與任何時期，則必各有可以代表其國家某時期之名人。予述民國名人小傳，由是中華民國興衰治亂之所由，畧可窺見矣。

孫中山爲民國國父，章太炎王王秋易實甫黎元洪則爲辛亥首義元勛。學術文章泰斗，實政治與文化之代表人物，故均稱字而不名，尊之至也。康有爲梁啓超皆維新之領袖，亦學術思想之鉅子。黎元洪爲首義元勛，張謇爲建設模範地方之實業家，詹天佑爲首建鐵路之工程家，皆屬一代名人之代表。蔣方震終身研究國防建設，實乃有光邦家之軍事人物，故以殿焉。世作中山傳者絕少，以其生平詳於自著『中國革命史』，不可以尋常傳體述之。茲篇依據『國父年表』及『先總理舊德錄』等書，而以本紀式記注之，以供他日撰述之筆削，非敢謂即正傳之定稿也。然一字之間，必有所本；而又不敢苟

同。如『國父年表』載中山生日爲十月初六日；又稱：『手書自傳』，其生日爲『華曆十月十六日』。今從其『手書自傳』，則『初』字當爲『十』字之誤；西曆『十一月十二日』，當爲『十一月二十二日』之誤，以本人生日，未有準確於『手書自傳』者也。太炎王秋實甫及康梁傳多述學述言之文，間有難識之字句，限於原文未可更易。元洪傳紀述較詳，意在稍存開國之史實。審傳多述建設事業，恐感枯燥，故附述韻事，殿以所擬國歌，讀之誠如左舜生先生所謂有泱泱大國之風者焉。天佑之工程技術，在歐美及吾國最近之科學界，雖不足奇；而在當年，固中國之科學開山祖師，數典者，何可忘乎？方震對於國防建設，雖未見諸實施，而徒託空言，又豈方震之咎哉？此十人者，自非民國全部名人之代表，尙有待於續補；要皆堅卓獨行非常之士，何慚開周之十亂？惜無馬班之文以傳之耳！

予性迂拙，不學無文；然不自量，好談歷史：濫竽大學三十年，兩主史系；——山西大學及湖北師院——避地南北廿餘載，四任史職；——戰史會指導委員及編譯委員史政局高級編審官史政處編修；——曾爲陝西全省師範中學諸史師數十人，講授國史於驪山，以廣義文化之演變爲中心，分古今爲八大時期，編成『中華文化史易通』一書。今茲所謂民國初期者，卽當時所稱『革化』篇中有關之資料也。此一時期，自戊戌變法，迄於對日抗戰，凡一切政治文化經濟軍事，何莫非所謂『革化』者耶？予之初生，適值康有爲保國會成立之日，——戊戌二月二十七日卽西曆一八九八年三月十九日——正是四夷交侵之時；而家在江夏李邕之故鄉，——湖北咸寧龍場村——邕同志安社稷，學貫天

人，世所稱：『六絕翰林，奇才第一；獨步天下，正氣無雙』者也！予雖不幸生逢喪亂，又何敢妄自菲薄？故草草半生，每於講授國學國史之暇，輒編集『李北海』十書，兼記注民國以來名人之生平。此十人傳稿，多客中急就之章，易君左先生曾見此稿，因獲承教於舜生先生及丁文淵先生，爲之印行，愧感交集矣。焚餘敝帶，謬誤實多，倘蒙有道，進而教之，其欣幸寧有涯耶！

中華民國四十二年夏曆二月二十七日，咸寧唐祖培節公謹識於香港之推卜舍一樓。

民國名人小傳

目次

孫中山傳	一
章太炎傳	二〇
王壬秋傳	三六
易實甫傳	五七
康有爲傳	七九
梁啓超傳	一一〇
黎元洪傳	一四一
張謇傳	一五一
詹天佑傳	一五九
蔣方震傳	一六二

民國名人小傳

孫中山傳

孫中山，名文，字德明，號逸仙。小名帝象，家人呼阿象。在日本化名高野，時用山月爲名，又曰中山樵，後則專用中山二字。嘗戲呼劉成禺爲劉漢，李書城爲李唐，石志泉爲石晉，馮自由爲馮野王，而自稱吳大帝。卒之日，先師黃季剛先生輓以聯云：『洪以甲子滅，公於乙丑卒，六十年間成敗異；生襲中山名，死傍孝陵葬，一匡天下古今同。』中山大名，與其生平，並垂宇宙矣。

曾祖行輝，妣某氏；祖敬然，妣黃氏；父達成，妣楊氏。民元前四十六年，卽同治五年丙寅（一八六六），夏曆十月十六日（從『手書自傳』），生於廣東香山縣（今名中山）之菜坑村，卽今翠亨村。中山先世由東莞遷香山，至敬然始居菜坑村，耕種僅足衣食；暇輒獨修入村之路，鄰飢常施米菽，夏季施茶村口涼亭，以利往來澳門香山縣城經此之行人，今猶踵行，鄉老莫不津津樂道積善之餘慶也。環村而居者，有馮陸楊孫諸族，楊鶴齡陸皓東咸生於此。孫氏居村之東北逕仔壆，數世不過十餘口。敬然從潮州地師韓某言，移葬行輝於距村二三里之上沙浦，土名黃草芒，韓某詠此地有：

『魚龍游北海，旌鼓樹南方』之句（魚龍一作巨魚，見馮百礪『國父身世瑣記』），其言皆奇驗也。

中山七歲入學，十一歲聞言太平天國事，以爲志士固當如是也！舞勺時，讀畢羣經。明年夏，侍母赴檀香山就兄德彰；是歲秋，肄業意奧蘭尼書院，三年畢業；又入阿湖書院。年十八，自檀香山返粵，明年秋，肄業香港拔萃書室，受基督教洗禮；翌歲春，轉學皇仁書院。四月十三日，與盧氏（卒於民國四十一年九月七日，年八十六）結婚。旋停習英文，專力經史之學；並決心傾覆清廷，創建民國。明歲肄業廣州博濟醫院，時年二十二，鼓吹革命益力，與陳少白尤列楊鶴齡朝夕往還，人呼爲四大寇。二十四歲肄業西醫書院，越三載，以第一名畢業；設中西藥局於澳門，明年遷廣州，更名東西藥局，施藥贈醫；並與鄭士良陸皓東尤列陳少白等，商討革命進行方針，由士良結納會黨，聯絡防營。年二十九，草『富强書』，偕陸皓東至天津上書李鴻章，不能用，十月二十七日，倡立興中會於檀香山，德彰及鄧蔭南等二十餘人贊助之。明年春，設總機關於香港，名曰乾亨行，與楊衢雲等輔仁社聯合，二月二十日，開興中會幹部會議，決攻廣州；並依皓東議，採用青天白日革命軍旗。八月二十二日，以興中會總辦讓衢雲。九月初十日，皓東等被捕於廣州。二十一日皓東等遇害，中山稱爲中國有史以來爲共和革命而犧牲之第一人；皓東少中山三歲，時年甫二十有七也。中山赴橫濱，成立興中會分會；聞日政府將引渡，乃斷髮改裝，赴檀香山；明年夏五月十六日，復至舊金山，聯合尤烈中和堂及中華會館，創大同學校。八月十七日，自紐約赴倫敦；九月初五日，被誘禁於倫敦清使館；館僕柯

爾爲傳書於康德黎（香港西醫書院總教習），以英政府干涉獲釋，乃撰『倫敦被難記』及『自傳』，暇輒研究於大英博物圖書館中。

三十二歲，完成三民主義之主張，由倫敦而加拿大而橫濱，倡設中西學校。初，中山在舊金山，論：『設會，必先有主義，主義定固，乃能成功。林肯主義曰：『民治民有民享』；孟祿主義曰：『美國人不干預美洲以外；亦不容非美洲人干預美洲。』主義愈簡單明瞭，愈生效力，此漢高祖約法三章之主義所以戰勝項羽也。今欲提出三民主義：一曰民族，此中國排滿革命主義；二曰民權，此世界建設民主政治主義；至於現代國家社會主義社會經濟政策，歐美風靡，他日必爲世界人民福利最大問題，尙無適當名詞，不能沿用民享。』成禺曰：『中國俗語，事不過三，所謂智仁勇，所謂土地人民政事，君子三畏三變，正德利用厚生，日本以三矢告廟，林肯以三民宣言，今開黨首定三民，亦約法三章也。』中山推案起曰：『得之矣！第三主義，定爲民生，本厚生意也。意義包含宏大，俄之虛無共產，德之國家社會政策，英美法之社會主義，皆在民生主義涵蓋之下，推廣之，將成世界主義矣。』

明年春二月二十七日（一八九八年三月十九日），康有爲倡立保國會於北京，時四夷交侵，中國式微，志士莫不興起；惟有爲志在政治革命，中山首重種族革命耳。是歲九月，日人宮崎寅藏及平山周介中山晤梁啓超商合作，卒因有爲反對未成。明年四月二十八日，衢雲與啓超晤談，仍不協。有爲啓

超於五月初六日，在日本組織保皇會。先是唐才常組織正氣會，後改名自立會，是時亦開國會於上海，均係革命團體，圖謀舉事，已與中山秘密結盟，用保皇會出面，利用其軍費也。中山自廣州失敗，與陳少白鄭士良逃日本，東京橫濱報紙，皆大書支那革命黨孫文陳少白鄭士良來日本觀光。謂少白曰：『革命黨三字最雅善，此後吾輩皆用革命黨三字爲號，取消前日造反字樣。』又曰：『自吾輩易造反爲革命，陳義大雅，究不如造反二字，深入人心，較易鼓動下層社會；然開國事業，當與薦紳先生言之，少白之言不誣也。今人多謂革命二字，只能代表革反，而不能代表革進，此大誤也。革命本中國語，不能以西語解釋。革命始於湯武，傳曰：『湯武革命，反之也。』直言之，卽造反，天命所歸，故革之。詩曰：『周雖舊邦，其命維新。』所謂革去舊染之污，而自新易舊，命爲新命，凡不合順天應人之事，皆宜革而去之，是含革反革進兩義。語曰：『莫非命也，順受其正。』凡事物皆有一定之至理，此天命也；逆反其正，必不能順天應人，是宜革之，並不專指朝代國家主權者言也。天地進化，今日光明正大之民主政治，他日有待革之處，亦難預言。予屢言革命尙未成功，乃舉選者大者而言，非舉小者近者而言。不以革反與革進評判革命意義，是未知革命至理者。』中山與才常有爲啓超皆言革命，而中山深切著明矣！

庚子夏，才常自立軍先後舉事於安徽大通湖南臨湘，未幾皆敗；七月二十八日，才常在漢口被捕遇害。是歲閏八月十三日，士良黃福舉義於惠州三洲田，進攻新安深圳，連破清兵；二十二日，士

良破鎮隆，擒清副將杜鳳梧；二十八日，士良經龍岡淡水，轉戰至三多祝，占有新安，大鵬至惠州，平海一帶沿海之地；明日，士良以糧盡援絕，解散所部，走香港，日人山田良政死之。九月初六日，史堅如炸粵督撫德壽，不成，被害。十一月二十日，衢雲被刺死於香港；明年七月十四日，士良亦死。革命之損失，亦大矣哉！

癸卯元旦，留日學生舉行新年團拜，馬君武與成禺演說排滿。先是東京學生雜志風起，商談民族主義，倡言革命，而諱言排滿。中山憂之，曰：『名不正，則言不順，匣劍帷燈之宣傳無益也。』召成禺及君武赴橫濱曰：『吾朋儕中有勇氣毅力，莫如二子，餘非依違兩可，即臨陣脫逃者。民族革命，要在排滿；舍排滿而言民族，其能喚起國內人民之清醒乎？今有一機會，元旦留學會團拜，歡迎振貝子，公使蔡鈞，監督汪大燮，皆在開演說會，禹生與君武，能提出排滿二字以救中國，大放其辭，自能震動清廷風靡全國。禹生楚人，君武原籍湖北蒲圻，亦楚人也。身家性命功名富貴之徒，不足與言亡秦之事矣！』屆時首由君武登台講演排滿，聲淚俱下，成禺繼之。清練兵處奉清廷寄，不准成禺學陸軍，遂出東京，並抄籍其武昌家產。『中山學說』及『自傳』，皆書：『自劉成禹元旦在留學生會館演說排滿，中國始知有革命。』後由汪大燮賠款六千元赴美，與學生會館幹事訂立條的，成禺一人不入士官，易自費生二十人學陸軍。方聲濤等，皆條約所交換。辦理此案，則蔡鐸蔣方震胡文瀾諸人也。是歲八月初六日，中山離日本赴檀香山，發表敬告同鄉書及駁保皇黨報紙之論文，加入

洪門致公堂，受洪棍（元帥）之職。明年春，抵舊金山，保皇黨運動關吏謀阻之，得致公堂黃三德之助，始獲入境。與保皇黨論戰，改組致公堂之『大同日報』，掃除保皇黨勢力，華僑咸歡迎之。在紐約撰告歐美人士書，題曰：『中國問題之真解決。』

歲乙巳，七月二十日，中國革命同盟會成立於東京，加盟者三百餘人，中山被推爲總理。先一歲，中山由日赴美，謀黨之大團結，乃謀設同盟會指揮事業。時三民主義五權憲法政綱草定，鄂學生在英法德比者，與禹生通信，詢及中山行動，以賀子才魏宸組史青朱和中周澤春等最出力。有馮承鈞者，撰黃筆小報寄美，中山見之曰：『此皆好同志也。今有倡同盟會之意，在美華僑，皆粵籍勞工，與中原士大夫毫不生關係，吾其有歐洲之行，見各省豪俊乎！惜此行旅費不足，容徐圖之。』成禹乃電告歐洲鄂學生，竟瀝美六萬佛郎，促中山行，遂建同盟會於歐洲，開成立會於東京，蓋定議於美洲，建會於歐洲，成立於東京，此同盟會始末也。是歲十月二十一日，『民報』在東京發刊，中山撰發刊詞，正式揭出民族民權民生主義。十一月十二日，留日學生反對日本取締留學生，全體罷課。首革同盟會章之陳天華憤而作絕命書千言，投海自殺，時年甫三十。俄兵據東北，天華嘗血書警告國人。返湘參與黃興革命計劃，亦革命健兒也。

丙午春正月二十日，中山自西貢赴星加坡，設同盟會分會。五月，設分會於吉隆坡等處；八月二十九日，函僑領張永福在星加坡速印『革命軍』。（癸卯四月出版）。嘗言：『自「蘇報」鄒容「革命

軍」發行後，中國各省，已造成士大夫豪俊革命氣象；但無綱領組織，徒藉籌款，附黨於三合會，不足成中國大事也。』十月二十九日，武昌日知會被封。十一月十六日，劉道一遇害於長沙。二十四日，日知會劉敬安等被捕。明年正月初七日，派許雪秋爲中華民國軍東軍都督，謀舉義於廣東潮州，不果。四月十一日，余丑起義於潮州黃岡；十六日，黃岡革命軍失敗。十八日，命欽廉會黨舉事；並遣黃興胡毅生往說廣東新軍將領郭人漳及趙聲。二十二日，命郭子瑜起義於惠州七女湖。五月初一日，劉思復謀炸清廣東水師提督李準，未成。初三日，惠州七女湖革命軍失敗。二十六日，徐錫麟起義安慶，鎗殺安徽巡撫恩銘，被執遇害。六月初四日，同盟會女會員浙江紹興大通學堂監督秋瑾起義密謀，爲清廷偵知被捕，初六日遇害。七月十二日，同盟會之『中興日報』在星加坡發刊。十五日，哈爾張永福等於星加坡籌款，再圖大舉。僑領輸財報國，中山稱爲革命之母，信不誣也。二十四日，哈王和順起義於廣東欽州之王光山。二十七日，攻占廉州防城，以援絕轉欽州。八月初三日，又以欽州內應不成趨靈山。初五日，破廣西橫州；明日，又破永淳。初十日，欽州革命軍失敗，退入十萬大山。十月二十五日，黃明堂攻占廣西鎮南關。二十七日，率黃興胡漢民及法軍官自河內至鎮南關督師。未幾失敗，退入安南。明歲戊申二月二十五日，興自安南進攻欽州。二十七日，破清軍於小峯。三月初二日，又大敗清軍於馬篤山。二十九日，命黃明堂起義於雲南河口。四月初一日，明堂占河口，斃清邊防會辦兼南防營務處王鎮邦。初五日，又占雲南新街，進攻蠻耗蒙自。興轉戰欽廉上思凡

四十餘日，以援絕敗，本日返安南仙安。四月初八日，命興爲雲南民軍總司令，抵河口；明堂本日占雲南南溪。四月二十七日，河口革命軍失敗。六月二十八日，武昌軍隊中之同盟會成立。十月二十六日，安慶馬砲營隊官熊成基起義，翌日失敗。明年己酉十二月十四日二十日，成基在哈爾濱謀刺清廷遣派出洋考察海軍大臣貝勒載洵不成，被執遇害。

中山四十五歲，庚戌元旦自紐約抵舊金山，設同盟會分會。明日廣州新軍起義，翌日失敗，倪映典死之。二月二十三日，汪兆銘黃復生等謀炸清攝政王不成，尋被捕監禁。是年夏，初晤蔣中正，傾談國事，許爲不可多得之革命人才。中山素以兆銘漢民，他年皆能任大事，美才也。漢民精深，能任內事；兆銘寬博，能任外事。使漢民運動外事，必少成就，遇事深刻也；使兆銘處理內事，或難恰當，寬博者易疏忽也。漢民主持內政，必井井有條；兆銘周張外政，極難僵局，自能打開。將來兩人事業，於此見之。而以死於黃花岡之林時爽，稱爲內外幹材。故至是一見中正，亟稱許之也。

辛亥歲，正月初一日，湖北振武學社改組爲文學社。二十五日，譚人鳳奉統籌部令到武昌商舉義。三月初十日，溫生才刺殺清廣州副都統孚琦。二十九日，黃興起義於廣州，進攻兩廣總督衙門，義聲振世界，爲是役前後死難之八十六人，葬黃花岡者七十二人。四月初二日，革命黨人攻廣東佛山順德。二十四日，趙聲卒於香港。閏六月初六日，中國同盟會中部總會在上海成立。十九日，林冠慈

陳敬岳炸清廣東水師提督李準，未中，死之。七月二十四日，湖北革命黨人決定舉事。八月十八日，漢口革命黨機關被破獲。十九日，即西曆十月十日，武昌首義。明日組織革命軍，推黎元洪爲都督。二十一日，光復漢口。中山是日得武昌首義消息，即由美哥羅拉多省典華城赴東美。明日光復漢陽。九月初一日，長沙西安光復。明日，光復九江。初三日，李沛基刺殺清廣州將軍鳳山。初七日，興抵武漢，被舉爲革命軍總司令。太原雲南上海杭州貴州蘇州廣西，及安慶福州廣州成都相繼光復。十月十二日，南京光復。明日，各省代表議決中華民國臨時政府組織大綱。二十八日，革命軍代表伍廷芳與清廷代表唐紹儀在上海舉行和議。十一月初六日，中山返國由香港抵上海。初十日即西曆十二月二十九日，當選中華民國臨時大總統。十二日，電勸袁世凱早定大計，虛位以待。明日即中華民國元年元旦，就任臨時大總統於南京，改用外人太陽曆。一月三日，黎元洪當選臨時副總統。章太炎評論：『同盟會有倡始佈置之功，而共進會有實行發難之功。姑以奕喻，布全局與白黑相殺，在奕中有相等之重要。布局，同盟會也；相殺，共進會也。今日咸以實行之功歸諸一二人，虛妄已甚，其去魏收史不遠矣！武昌立政府後，元洪爲首；同盟會則以中山爲首。國之元首，有相爭之局，故行共和制以均衡權力，乃舉中山爲總統，元洪副之。此固不得不然之勢，而事前籌備實未嘗周密也。』中山會謂：『自「蘇報」馬福益徐錫麟洪承點熊成基各案發生，國內士大夫革命洶湧，大非昔日下層工作可比。吾知排倒滿清，可告成功；但建立中華民國基礎甚遠。滿清帝國一倒，中國人人皆抱皇帝思想，

此後中國民族歷史，其中不知經過多少帝制軍人專制途徑，乃獲真正民國之望。吾欲爲中國人民，立一尊號，名曰帝民，副人民欲作皇帝之願望也。予少年主張漢人作皇帝，亦可擁戴；以打倒外族滿清爲主體。楊衢雲與予大開，幾至用武，謂非民國不可。衢雲死矣，予承其志，誓成民國；帝制自爲，吾必討之。』陳少白言：『中山學醫後堅決排滿，於共和制度，尙有出入。與衢雲交，旣莫逆，衢雲則非造成民國不可。一日議論有出入，衢雲持中山辯，盛氣欲毆之，予在傍分開兩人。時中山在廣州，乘官轎出入總督衙署，醫治少爺，故小辯尙留，與我輩在港剪髮革履不同。』中山又言：『他日中國排滿成功，所憂患在帝王思想，名非皇帝，擁兵造亂，有過於帝王者，是吾民之大患也！』二月十三日，中山向參議院辭臨時大總統；並舉世凱自代。先一日，清帝溥儀退位；是日，世凱組織北京臨時政府。二十日，盧氏抵南京。三月十一日公布中華民國臨時約法；世凱先一日，在北京就職。十三日，任唐紹儀爲國務總理。二十五日。盧氏離南京返粵。四月一日，中山解卸臨時大總統任，出席同盟會餞別會，演講民生主義與社會革命。五月五日，共和黨成立，元洪爲董事長。六月八日，定五色旗爲國旗。十六日，紹儀辭職。八月二十四日，中山自上海抵北京，與世凱談鐵路外交實業問題。明日，同盟會改組爲國民黨，中山爲理事長，旋委宋教仁代理。九月二日，受任督辦全國鐵路。二十八日，參議院定十月十日武昌首義日爲國慶紀念日，政府公布之。

二年三月九日，教仁發表演說，抨擊時政。二十日，世凱遣人刺教仁於上海車站，二十二日卒。

中山當時主立即舉兵討袁，興等則主法律解決。五月二十八日，國民黨人發動討袁，襲擊上海製造局。明日，共和黨民主黨統一黨合組爲進步黨，與國民黨抗。未幾，贛督李烈鈞粵督胡漢民皖督柏文蔚先後被世凱免職。七月十二日烈鈞舉兵聲討世凱，爆發二次革命。各地相繼舉兵討袁；但旋即失敗。十月六日，世凱威迫國會選其爲正式總統。明日，元洪當選爲副總統。十五日，世凱以北京總檢察廳名義通緝中山及二次革命首要。十一月四日，又解散國民黨，取消國民黨籍之國會議員。明年一月十日，復明令解散國會。五月一日，更公布新約法，廢止民國元年之臨時約法；廢止內閣官制，改內閣總理爲國務卿。七月八日，中山在東京就任中華革命黨總理，宣誓再舉革命。二十八日，第一次世界大戰在歐洲爆發。明日，中山致書南洋洪門同志，固結團體，再做革命工作；旋派居正赴南洋。九月一日，定青天白日滿地紅旗爲國旗。十一月二十五日，與宋慶齡在東京結婚，中山時年四十有九矣！

四年一月十八日，日本提出二十一條要求；五月九日，世凱承認其最後通牒。六月七日，中俄蒙訂立恰克圖條約，外蒙自治。八月十四日，籌安會出現，帝制運動揭幕。九月十五日，陳獨秀等之『新青年雜誌』發刊。十二月二十五日，雲南起義，成立護國軍。三十一日，世凱改明年爲洪憲元年。中華革命軍東北軍總司令居正於五年五月四日，舉兵於山東濰縣周村等地。十八日，陳其美在上海遇刺死。二十三日，居正克濰縣；二十五日，攻濟南，未下。六月六日，世凱卒。明日，元洪以副